

दिनांक : 21.04.2026

समय : 18.45 बजे

आकाशवाणी जयपुर—अजमेर
प्रादेशिक समाचार

- पचपदरा रिफाइनरी मांय काल लाय लाग जावण रा वाकया री आला दर्जा री जांच सरू—मुख्यमंत्री भजन लाल शर्मा लाय लागण री ठौड़ रो जायजो लीनो।
 - **मुख्यमंत्री किसान सम्मान निधि** री छठी किश्त काल जारी करी जावेला—करीब साढे 66 लाख किसानां रा खातां मांय 665 करोड़ रुपया ऊँ बत्ती रकम भेजी जावेला।
 - राज्य मांय सूरज री रोशनी ऊँ बिजली बणावण सारू घरां री छतां माथे करीब अढाई लाख मशीनां लगायी ज्यी।
- अर
- जोधपुर संभाग मांय आवता दो दिन धूलभरी आंधी चालण रा आसार—23 अप्रैल ऊँ कटे—कटे लू बाजण री शंका।

000

मुख्यमंत्री भजन लाल शर्मा पचपदरा री एचपीसीएल रिफाइनरी री कूड डिस्टिलेशन युनिट मांय काल लाय लागण रा मामला रो जायजो लेवण सारू आज वाकया री ठौड़ रो दौरा कीनो। वे लाय बुझावण वाळा कर्मचारियां सागे ई बातचीत कीनी। वां सागे कैबिनेट मंत्री जोगाराम पटेल, मुख्य सचिव वी. श्रीनिवास अर पुलिस महानिदेशक राजीव शर्मा ई मौजूद हा। कैबिनेट मंत्री जोगाराम पटेल आज पचपदरा मांय खबरनवीसां ने बतायो के वाकया री गहरी जांच करी जा रही है। पटेल लाय माथे काबू करण सारू हिन्दुस्तान पेट्रोलियम कॉर्पोरेशन लिमिटेड री तुरत कार्यवाही री सराहवणा कीनी।

.....

बालोतरा रा जिला प्रभारी मंत्री के.के. बिश्नोई कहयो के रिफाइनरी ने बेगी ई जनता ने संपी जावेला। वे कहयो के रिफाइनरी रो प्रधानमंत्री रा हाथां ऊँ उद्घाटन री आगली तारीख तय करी जाएगी।

.....

वाकया री आला दर्जा री जांच सारू समिति बणायी ज्यी है। करीब 80 हजार करोड़ रुपया रा खर्च ऊँ बणायी ज्या तेल साफ करण रा ई कारखाना रो प्रधानमंत्री नरेन्द्र मोदी आज उद्घाटन करण वाळा हा पण लाय लाग जावण रे कारण ओ कार्यक्रम आगे टाळ दियो ज्यो।

000

मुख्यमंत्री किसान सम्मान निधि योजना रो राज्य स्तर रो कार्यक्रम काल जोधपुर कने ओसियां रा मडियाई खुर्द मांय राख्यो जावेला। कार्यक्रम रे दौरान मुख्यमंत्री भजन लाल शर्मा 66 लाख 56 हजार किसानां रा खातां मांय 665 करोड़ रुपया ऊँ बत्ती रकम भेजेला। ई योजना रा तैत हाल ताई पांच किश्तां मांय 2 हजार 726 करोड़ रुपया ऊँ बत्ती रकम किसानां रा खाता मांय भेजी जा चुकी है। ध्यानजोग है के राज्य सरकार प्रधानमंत्री किसान सम्मान निधि रे अलावा आ रकम दे रही है, जिण ऊँ किसानां ने हर साल 3 हजार रुपया री और मदद मिल रही है। प्रदेश रा किसानां ने ई रकम समेत कुल 9,000 रुपया सालाना री किसान सम्मान निधि रकम मिल रही है।

000

कोटा रा लाडपुरा विधानसभा हलका मांय लोकसभा अध्यक्ष ओम बिरला लगभग 85 करोड़ रुपया रा खर्च वाळा विकास रा काम जनता ने संप्या अर नुवा कामां री सरूआत कीनी। ई मौके बिरला कहयो के कोटा अर पूरा हाड़ौती हलका ने विकास रा हर मानक माथे अगाड़ी बणावण माथे वां रो खास ध्यान है। वे कहयो के खेती—बाड़ी अर रहवासी कॉलोनियां मांय आवता बगत री ज़रूरतां ने ध्यान राखता थकां सुबीतां मांय बधोतरी करी जा रही है।

000

अमरीका अर ईरान मांय चाल रही तणा-तणी बीचे लड़ाई रोकण री मियाद काल पूरी व्हे रही है, हालांकि दोन्यू बीचे नुवा सिरा ऊँ बातचीत री संभावना अर होर्मुज जलडमरूमध्य ओजू खोलण रा मामला मांय फिलहाल अनिश्चितता बण्योड़ी है। ई बीचे अमरीका रा राष्ट्रपति डॉनल्ड ट्रंप लड़ाई रोकण री मियाद बधावण ऊँ नट गया है। वे कह्यो के दोन्यू बीचे कोई करार नी व्हेवण री सूरत मांय संघर्षविराम खत्म व्हां पाछे ओजू हमला कर्या जावेला। अमरीकी पख री ओर ऊँ मिली जाणकारी रे मुजब उपराष्ट्रपति जे.डी. वैंस बातचीत सारु आज इस्लामाबाद जावेला हालांकि, ईरान री ओर ऊँ मिल्या-जुल्या संकेत मिल रह्या है। ईरान री ओर ऊँ सोमवार रात वटे रा सब ऊँ ऊंचा नेता री अमरीका सागे बातचीत री मंजूरी मिली है, हालांकि अहलकार हाल ताई बातचीत मांय भागीदारी री पुष्टि नी कीनी है। ध्यानजोग है के ई महीना री सरुआत मांय पाकिस्तान री राजधानी इस्लामाबाद मांय अमरीका अर ईरान बीचे व्ही पहला दौर री बातचीत नतीजा बगैर खत्म व्हे गयी ही।

000

सरकार प्रधानमंत्री मुद्रा योजना रा तैत 860 रुप्या रा अनुबंध शुल्क माथे 7 लाख रुप्या रो कर्जा देवण रो दावो करण वाळा स्वीकृति पत्र ने फर्जी बतायो है। पत्र सूचना कार्यालय-पीआईबी री तथ्य जांच ईकाई रे मुजब सूक्ष्म इकाई विकास अर पुनर्वित्त एजेंसी मुद्रा सूक्ष्म कारोबारियां अर लोगां ने सीधा कर्ज नी देवे है।

000

भरतपुर रा केवलादेव राष्ट्रीय उद्यान मांय आज सारस री गिणती सरु व्ही। वन विभाग अर घना केवलादेव नेचुरल सोसायटी री ओर ऊँ करी जा रही ई गिणती सारु 17 ज़ोन बणायी ज्या है। गिणती करण वाळां मांय उद्यान रा अहलकारां अर कर्मचारियां सागे गाइड, कुदरत प्रेमी अर उद्यान मांय रिक्शा चलावण वाळा शामिल है। गिणती रा काम ऊँ पैली उद्यान मांय सारस रा अस्तित्व अर पानी संकट रा बारा मांय गोष्ठी ही राखी ज्यी।

000

राष्ट्रीय जनसम्पर्क दिवस रे मौके आज ब्यावर मांय करियर मार्गदर्शन सत्र राखी ज्यो। ई दौरान सूचना अर जनसम्पर्क विभाग री ओर ऊँ विद्यार्थियां ने सरकारी अर गैर-सरकारी हलका मांय जनसम्पर्क अभियान रा बारा मांय जाणकारी दीरीजी अर नौकरी रा मौकां रा बारा मांय बतायी ज्यो। ई मौके भरतपुर मांय **जनसम्पर्क-लोकतंत्र और समाज के बीच सेतु** मुद्दा माथे संगोष्ठी राखी ज्यी।

0000

भारतीय वायुसेना री ओर ऊँ डूंगरपुर री एकलव्य आदर्श आवासीय स्कूल मांय करियर जागरूकता कार्यक्रम राखी ज्यो। कार्यक्रम मांय विद्यार्थियां ने वायु सेना मांय भर्ती री प्रकिया अर परीक्षा प्रणाली, अग्नि वीर अर दूजा ओहदां माथे भर्ती रा बारा मांय विगतवार जाणकारी दीरीजी। कोटपूतली-बहरोड़ मांय राजस्थान फिनिशिंग स्कूल री सरुआत करी ज्यी। ई रा तैत राजकीय लाल बहादुर शास्त्री पीजी कॉलेज मांय नौजवानां ने बोलण री तकनीक, व्यक्तित्व विकास अर इन्टरव्यू री तैयारी री सिखावण दी जावेला।

000

प्रदेश मांय हाल ताई घरेलू अर औद्योगिक श्रेणी मांय छत माथे सूरज री रोशनी ऊँ बिजली बणावण री 2 लाख 45 हजार ऊँ बत्ती मशीनां लगा दीरीजी है। इण ऊँ करीब एक लाख 43 हजार ग्राहकां रो बिजली रो बिल शून्य व्हे गयो। छत माथे सूरज री रोशनी ऊँ बिजली बणावण री मशीनां लगावण रा मामला मांय राजस्थान देश मांय तीजा नम्बर माथे है। राज्य मांय पीएम सूर्य घर योजना रा तैत हाल ताई 686 मेगावॉट बूता रा 1 लाख 77 हजार ऊँ बत्ता रूफ टॉप संयंत्र तैयार कर्या जा चुक्या है अर रोजीना 675 ऊँ 700 नुवा ग्राहक सौर ऊर्जा ऊँ जुड़ रह्या है।

जयपुर-जोधपुर अर अजमेर विद्युत वितरण निगम सौर ऊर्जा संयंत्र लगावण ऊँ जुड़ी प्रकियावां आसान बणायी है। ई रा तैत कर्मचारियां ने बधावो देवण सारु रूप टॉप सौर चैम्पियन अवार्ड ई सरु करी ज्यो है।

000

खेती-बाड़ी मांय राज्य री महिलावां री भागीदारी बधावण सारु वां ने सिखावण दी जावेला। ई सारु हर ग्राम पंचायत मांय कृषि प्रशिक्षण शिविर लगाया जावेला। कृषि आयुक्त नरेश गोयल आ जाणकारी दीनी। वे बतायो के खास तौर ऊँ लघु, सीमांत, अनुसूचित जाति अर जनजाति तबका री महिलावां सागे स्वयं सहायता समूहां री महिला किसानां ने सिखावण दी जावेला। कृषि आयुक्त बतायो के सिखावण रे दौरान खेती-बाड़ी

री नुवी तकनीकां अर उत्पादन मांय बधोतरी रा तरीकां री जाणकारी दी जावेला। गोयल बतायो के हाल ही पूरा व्ह्या माली साल मांय महिलावां री सिखावण सारू 11 हजार ऊँ बत्ता कार्यक्रम राख्यी ज्या।

000

राज्य मांय पड़ रह्या जोरदार तावडा बीचे घणखर हलकां मांय अधिकतम तापमान 40 ऊँ 42 डिग्री सेल्सियस बीचे चाल रह्यो है जो सामान्य ऊँ 2 ऊँ 3 डिग्री सेल्सियस बत्तो है। मौसम विभाग रे मुजब काल ऊँ पारो 1 ऊँ 2 डिग्री सेल्सियस और चढबा रा आसार है जद के 23 अप्रैल ऊँ कटे-कटे लू बाजण री शंका है। आवता दो दिन ताई जोधपुर संभाग अर आरे-सारे रा हलकां मांय धूलभरी आंधी चालण री संभावना है। ई बीचे आज चित्तौड़गढ़, बाड़मेर अर चूरू समेत केई ठौड़ां पारो 40 डिग्री सेल्सियस ने पार कर ग्यो।

000

आईपीएल क्रिकेट होड़ मांय आज सनराइजर्स हैदराबाद अर डेल्ही कैपिटल्स बीचे मुकाबलो व्हेला। ओ मैच अब ऊँ थोडी देर पछे साढे सात बज्यां हैदराबाद रा राजीव गांधी स्टेडियम मांय खेल्यो जावेला। आईपीएल रा ई सीजन मांय सनराइजर्स हैदराबाद चौथा अर डेल्ही कैपिटल्स पांचवां नंबर माथे है। एस.आर.एच. 6 मैच खेल र 3 जीत अर 3 हार सागे 6 अंक जद के डेल्ही कैपिटल्स 5 मांय ऊँ 3 मैच जीत र अर 2 मैच हार र 6 अंक हासिल कीना है।

000

प्रधानमंत्री नरेन्द्र मोदी 26 अप्रैल दीतवार ने आकाशवाणी ऊँ प्रसारित कर्या जावण वाळा खास कार्यक्रम "मन की बात" मांय विचार बतावेला। आ हर महीना प्रसारित कर्या जावण वाळा ई कार्यक्रम री 133वीं कड़ी व्हेला। ई सारू आप ई 24 अप्रैल ताई मुफ्त नम्बर 1800-11-7800 माथे राय भेज सको हो। ई सागे ई नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है।

000